



Hĩbaallĩc 'cĩ Abbiiri Ōō



Waraga 2

“Waraga 'cĩ Apulana 'Thoo'thiok”

Nyilōk cĩ Ōmōtō

Eberria 'Gaalacĩ cĩ Namorunyangi Juubattĩ



Brunos Loki Philip

Hĩthaayyio ngagiit vėlėk Dĩdĩnga 'cĩg aattĩg Juubattĩ hĩ Toorita hĩ Dĩdĩdnga 'cĩg attiyu ōlō. Engeraaheet reiithi Thalva looc 'cĩ haĩ Namorunyang.

Nėėthĩ adiim reiithi heberia Dĩdĩnga hĩ

Lōngarrim'gaalac cĩnĩng hũk haggam Namorunyang. Ma baa athĩhĩ Dĩdĩnga hĩ Lōngarrim thōōth icci ho, ĩtō hėbėra occa nganĩ?

Ammũdeek baa aattĩg 'gaala 'cĩg obbitig 'cĩg Dĩdĩnga hĩ cĩg Lōngarrimaak vėlėk kōr tĩho. Eetini vėlėk ĩcĩg baag au, 'gaala 'cĩg baa aattĩg ko cieegi:

Dr. Daavide Nailo

Hon: 'Thabiina Dario

Hon: 'Pėtũrũ Longole

Hon: Luuccio Attiool

Fr. Maurii'thio Loguti

Baa adiim 'gaala cieeg vėlėk aĩ occa habĩlla heberiaaet Dĩdĩnga hĩ Lōngarrim hatĩ haggamit Namorunyang. Ma ngaati, ĩtĩnga nyakangaan umwa 'cĩ ĩn Lōngarrimeenit nė uduhaak 'Thabiina Dario hĩtĩnga 'jjeena. Ma 'thėk nga ĩngaathĩ loholec hoti ho, urukteek eeta athĩn hĩccĩnĩt lōkĩlĩlĩ. Nĩngĩtĩ aduhaakĩ Daniel Narroi 'Thabiina annėėkĩ,'gaalac 'cĩ adiim Dĩdĩnga hĩ Lōngarrim ko niina. ĩkō 'pee ammũdeek abũrĩ baa 'Thabiina ngaatĩ occa ōkō aayyi Namorunyanga.

Ma baa ajin Hĩbaallĩc 'cĩ Abbiiri Ōō 'Thabiina thōōth icci ho, uduha ĩ, haburi naa Namorunyang hĩnĩngĩtĩ hithihi maam, hithihi arteenit nė tarĩ aitiōō 'gėėn buúk tōō. Nė thōōth 'cĩ abathĩ gėrrėėt, thōōth 'cĩ akannėėkĩ 'gaala ũgėėgĩ Humi huruhit eet cĩg Dĩdĩnga Ngauurottĩ irkinyia vėlėk. Ma baa hoti ho, amammaayanit Dĩdĩnga hĩ Lōngarrim 'Thabiina hataarōthĩ thoo'thiok iccig vėlėk hũk haganĩthan Humi hagayyio hĩ Dĩdĩnga hĩ Lōngarrim buuk. Nĩngĩtĩ mĩ ĩlėmmĩ 'Thabiina thōōth 'cĩ aduhaak ĩnōōnō lothipiti. Hĩnĩngĩtĩ loota nĩnga, aitiōō ĩtĩ 'cĩ occa abũrĩ thōōth cĩ eet 'cĩg mėlĩg tōō.

Nga thĩ 'yioko alũtĩ Dĩdĩnga hĩ Lōngarrim Juubaattĩ hatĩ hittioonito 'thaar 'cĩg 'Thabiina hanyaktoothĩk reiith Thalva hatĩ horoong hėlėm berriaanĩt cĩ 'Thabiina. Abũtan 'Thabiina aĩ, ma hitihima cėrėm cĩ 'gallathėėtō, iittiōō hatĩ Dĩdĩnga hode Lōngarrimi hōllōngaa aruhōō hĩ Humi tarĩ. Iittiōō hatĩ eeta cieeg hōllōngaa akannōō tĩn tarĩ hode nėē occa nga aruk eet umwaa ngaai hĩ lōhōlĩ hĩ nyakangaanya. Nė tarĩ hĩcĩ eberria 'Thabiina ho, ōngōnyōōnĩ hatĩ dtaaba hĩ eet 'cĩg mėlĩg gėrrėėt. Aduhaak 'Thabiina Hĩbaallĩc 'cĩ Abbiiri Ōō anneck, meelĩg mĩrōha cĩgannĩg gėrrėėt. Ūbucanniaa 'Thabiina occa baa adaaha hĩnĩngĩtĩ aruk eeta ĩgėrnėnĩ. Halayyiooĩ 'Thabiina hatĩ hėėl Nyekuci ĩnōōnō nė aganĩthan haggayyio hĩ mĩrōk cĩgĩnnĩg buúk.

Muhėėttaa cĩ Dĩdĩnga hĩ Lōngarrim 'cĩg aattĩg Juubattĩ, adiim hatĩ ōō ōmmōtōō hĩ Humi Hapuataawa hothoothito thōōth cĩ lootu hatĩ hũrũmtĩ eeta lōngōōc.



Adiim Ĕhēēd Bruno Nyepitee hī Nyattal c'i Dīdīnga

Brunos Loki Philip



Hōlō, aā buuleniti umwaa 'c'i haī Bruno 'c'i ēdēcaak 'thukuul c'i 'limman c'i nyepitee hī nyattalliook c'ig lootu vēlēk. Adiim Bruno nyepitee hī nyattal c'i Dīdīnga heteheeddi lootu, hātī hiita hitingilitoo lohollia c'ig irkinyia ūgī nyepitee'nya hī nyattalliook c'i hībaangī c'iggīng. Nē tarī aī Bruno occa eheeddi nyattali aagōōng aggamī Dīdīnga eleeti hode irriōōnīkī lōhōlī. Ōtō Bruno loonyini c'ig habīlaa'nya c'ig mēēlīg nē udtuuha 'gōōl 'c'i adīmanī eeta tīko Dīdīnga 'buth. Baa aā eet umwaa c'i īn 'Baarriaac 'c'i arritoothīk būhēēc 'c'i īn Dīdīngaac 'Jaubattī. Ma baa anyaki būhēēcī tīho ho, ukul Baarriaacī iitho mōrō. Ma ngaati ammūdeek maa'nyī būhēēc tīho ēggēēnyīth ōō, nīngītī ōkō aggamī maanyī 'Baarriaac tīho hangathanōō. Ma baa ikia tīlītha loholec 'c'i arrittiaa ho, īi maka ,ikia īi tirriyyioohiti hadiimi hōkōōlī loholec cīnī. Ammūdeek baa ēdēnī eeta loholec gērrēēt. Ma ho, ūūk ībīl 'Baarriaacī tīho lokihooa. Ōkō tarī hatī annek 'gaadī īnōōnō aga nii nyepitee c'i 'thūwan c'i Dīdīnga? Ĕbēk hinnie 'Baarriaacī 'gaadī hebereeca dionī. Nīngītī abūrī 'gaadī thōōth cīnī ho, nē īnīk bīt nōō mūda adīman 'thēk gōōng Dīdīnga 'thūwan cīnīng hutuno. Thoo'thiook ūgī cieeg 'c'ig tiirik 'c'ig adiimi ēhēēd Bruno ho.

Ītīmanek baa Ingilitheeniti umwaa 'c'i haī Dūrūbēk ngaatī ēhēēdī nyepitee c'i Dīdīnga. Nēēthī ikia adaak eet tīho nga hūttūbaneek teheednit c'i nyepitee c'i Dīdīnga ho. 'Yioko korriook iccig Dīdīngaawa, illioorito buul haaga iittiōō hōllōngaa athīhī maajihī hī ngaaggi. Ulubta thoothioha 'c'ig aattīg hoti hīnīngītī atarriothī eeta nyepiioo hī nyakērēhēt hī thaappaniinit. Baa irkit c'i 1992, baa aā nyepiioo cobbi Thugura nyakērēhēta Napērētōma. Baa alawa eeta olī cobbi hī Lokutelem hatī hikia hucuhanī. Ma baa ippotan

Lokutelemī olī ho, ōkō hinnie ēdēnī ngeerīnī 'c'i baa gōōng īn mōkōraac haī Nabukō. Ma athīhī eeta thōōth icci ho, īthōōcō buul hōōt haggamit Nabukō nē ēcēbta 'jieena. Ma baa ōdōlanī Nappērētōm ko, etengeddia eeta 'guuli hī 'gurrumok nē ūlūktī logguur 'c'i Nabukō. Aī jūwaan c'i Nabukō. Udhukteek mī eeta Nabukō logguuratōō tīhō nē itiktia 'gurrumohit urwacattēēhī bahuuca hī 'battan. Ĕlē arruui Nabukō. Aī hōlō, ōōt ingiddia taang hikia hucuhanī. Nīngītī mī edeethini Nabuko īthōng hikia huruk 'gotonna baa nīnga hadaak.

Aggammi eeta 'c'ig baa gōōng īn mōkōraanya uuki lōggōō habath luulu dtēc. Rēēō thī baa edeccia nyepiioo nyakērēhēta, ikia ūbūna lōōcī c'i Thuguro ūdūt hī noho. Aduha Bruno aī, abūnnaa hat'hūnnī nyepitee cīnaac hātī hiita hūūlanit lohollia vēlēk. Abūnnaa ma a'thūwan mirohiti loholec c'i īn Dīdīngaac, aku aggiil nē ūnū nyattal c'i 'thūwan c'i Dīdīnga.

Nyūūr

Kaarlo Lukure Romeo

Baa kōr umwa hīngaanna naag hī nyakangaan looccaa c'i haī Lomoronyang hata, ōlōō c'i Loyyiahori hauunna īcī looc c'i Bēētī Tiyyiootto. Ma baa hōdōlanna līl 'c'i baa gōōng ahūdēēnī maalana ho, udtuuha nyakangaan 'gii umwa 'c'i ōmmōōtī dēmētaa c'i liilu. Ma baa atarraaban ko, acīn hinnie īn nyūūr. Nīngītī acuuhanī noho 'puthuk. Ma atarī nyūūrī dīla ho, aluci hinnie haau hī tēē. Arrīdan hīnna dīla hīnīngītī īn ēlē cīnī bō'thōhō 'c'ig ōkōmī aattīg hī biyyieena. Haī 'thaar c'ig nyūūrak ūgī nyēmēhīmēēk. Ĕmēēdaanī nēē ngaatī ēdēcī dēmēt c'i liilu nē oongi ilomēētī hī 'lōōhītī tōō. Ĕgī nyūūrī arteenit nē tarī adak īttīngī. Adtican bōhōhō c'iggīnīg ko, dtiicanī 'c'ig mēēlīg gērrēēt. Ĕwēēthī eeta hōjōrōōnīt nē tarī aggam 'garrieena bōhōhō c'iggīnīg ko gērrēēt buūk. Aitiōō nyūūrī hōllōngaa aalla 'rōta hōdēēthōng. Ōvvō nēē looc vēlēk horwatōō nē ēggēēnyīth gērrēēt. Thōōth c'i nyūūrō ho cien noho.



Abūrī Dīdīnga 'Thukuul Baarkit

Nahicoda

Liino Pooppo Albert Lokonoō Alemungitukoi

Baangaani 'rīng, baa au 'gaala ūgēgē 'cīg anneck Didinga Ingilith hiita hupwaatta Nahicoda. Baa au Ingiliithi aī hiita hillimatteeha Dīdīnga 'gii 'cī haī 'thukuul. Ma baa kōr umwa, udukaak nyakangaanya iītīk aanyeteetu lōhōlī ūgī hillimatta hagaacō' thukuul hatī hiita heggeenyito. Ēdēcī hinnie nyakangaan umwa 'cī ahimit caar cī lottimo bahuca aī, ne thīnō 'cī ōthōōth bōrōhēēcī niccie ho Awwookōl? Ēdēcī 'goonnia anneck horong occa Nameritom? Ma ho, iīnnīk nyakangaan 'gōōnī duhaak daho nii boroheec nicciaa anneck, ha'nyahi nēē'thēk loholec hōdēēthōng 'cī hinnie anū 'gii umwa diooni. 'Gii tīho nii, taang. Ma nīngaata ūūik eet 'cī iīn Ingilithenit ko tīn baakīta Longinaawa ngaatī ōbōhō hī Naoyyahītēla 'cī iyyioko adhukiaanī tēera ho. Ittiaman Ingiliithi thōōth iccī i'thōng anyamanēēhī nīngītī iŋgaannī ōōī icī looc cīnīng.

'Yiooko baa hēlēmtaahī nyakangaanya cīggaac Ingilithi hillimanit lōhōlī, occa baa ētēhēnyī nē ēggēēny lōōcī cī Dīdīnga baarkit.

Lohiirto hī Lokīdōdōōk

Dominic Natemo Loomwa

Baa aāi lohiirto kōr umwa i'thōng nēe atararī lōkīdōdōōk iīnnīk, ac ne iyyioko 'thēk nii lōkīdōdōōk, i'nya gōōlaa 'cī hōkōōyyī naana. Ara iyyioko 'thēk ingothi hutuno hī hēbērī 'cīg turalīg a'nyahi hī 'guumunu ho. Ēdēcī lōkīdōdōōhī anneck, lohiirto, ma iyyioko 'thēk nii 'cī hugguli hēēng haaga nē otoou hī 'cī ammūjī loocī thōng ko, occa havviroo hī nganīta? Ēdēcī lohiirto anneck ēlē, aga 'thēk nii thōōth 'cī aduha ho?

Ma ho, ummuk lōkīdōdōōhī hīdīkothōng iī, hogooni occa hutuno? Ma nīngaata, iīnnīk ēētī lohiirto occa hījaari naa nganiita. Nīngītī annēēkī lohirrto iīnōōnō haarik 'thī da nīngītī hōō hōmmōtōōnī hīcīnīt eet 'cī ōkō attiman icī oou. Ēlēm lōkīdōdōōhī buūk hī cī aduha lohirrto ho. Ma 'thēk

ēngērō nīngaata ho, ūūk ūlūta lōkīdōdōōhī 'gōōnōggī, nē iīnnīk, lōōggō, iyyiaa homotoonna hī lohiirto nēē'thēk atararra nīcī noho iīnnīhaa, ac ne iyyioko 'thēk nii lōkīdōdōōk, i'nya gōōla 'cī hōkōōyyī naana. Ara iyyioko 'thēk ingothi hutuno hī hēbērī 'cīg turalīg a'nyahi hī 'guumunu ho. Nīngītī hannēēkī naa buūk, lohiirto ma iyyioko 'thēk nii 'cī hugguli hēēng haaga nē otoou hīcī ammūjī loocī thōng ko, occa havviroo hī nganīta?

Nīngītī mī hēlēmma naag vēlēk nē haariha nīngītī hooyiaa hommottoona hīcīta eet 'cī ōkō atiman icī oou. Haku iyyioko haduhaakuung naa ngaiit ōōt eddeerrioothīk niig vēlēk goollīhī 'cīg hōō havviroonna naag hī lohiirto ho i'thiaannaanu uruta i'thōng nīngītī hatī ōkō aduurnīkī ireta. Ma avvī lohirrto aī lōōkīdōdōōk, ēdēcī ēētī 'cī aāi icī oou aī, hōōk. Hammuhi occa ithiktu niig vēlēk. Baa ēdēcī goonoggia anneck hīthīkta.

Ma baa ma ōō i'thiaannaanī lohiirto hī lōkīdōdōōk iret ko, ammuk nēē lohiirto aī, hījaari baa nēē hatī naa lōkīdōdōōk haaga. Baa avvir lohiirto i'thōng ara tūvvēēnīt 'cī aī, lōkīdōdōōk, ēdēcī lōkīdōdōōhī 'cī aāi icī oou aī hōōk, avvir lohiirto gērrēēt nē ūtūvvō tarī lōkīdōdōōk, ēdēcī 'cī aayyiaa icī oou aī hōōk. Baa arrīcana lohiirto iret i'thōng haabur 'thīnīt hī 'gwaa 'cī atūūthī lōmmōōfīna. Ma baa ōdōlan kō, ammūdōōthīk hinnie lōkīdōdōōk i'ppīra 'yiomman 'thōng. Ma 'thēk nīngaata noho i'jaahō 'thēk lohiirto kim haaga iitiōō thōōth 'cī nga ōthōōth tōō. Nīngītī annēēkī lōkīdōdōōhī iīnōōnō, ēlē haggalanī 'thēk naag hīdīc hīdīc hōdōlanī 'thēk hatī 'pee.

Magīth 'cī haī 'Muuk Ēmmēn

Joseph Lokirimoi

Baarkit, baa aku magīthī uwmaa 'cī anneck eeta 'muuk ēmmēn. Magīth 'cī baa obbi cieie gērrēēt 'cī 'thēk ūdaan looc 'cī Dīdīngaa hūtūrūūr. Ma 'thēk aī halaam eet umwa loholec 'cī ngayyi 'gōōla buūk, ēttēēdak 'thēk loholec eet thōōth anneck ma nēē hatī akīthī nii icī ōlō 'cī ngaanonu, hakīthī hatī naa buūk? Hīnī nii eet 'cī adaka magīthī haburi eet 'cī aduhaaka ōlōng. Baa ammūdeek aattīg tīna ōlōō cīnaang. Occoho au 'thēk eeta 'cīg maacīg ngaanī noho adiiim biyyi. Baa ammūdeek iīn nganīt nyakangaan eet 'cī abūnnaa gērrēēt. Nīngītī mī anneekeet agamit tīn niccig ēdēēmtak



eet biyyi; ĩn magĩthĩ 'gii 'cĩ abathĩ gěrrěēt. Ma ho, ũũk itiha nyahappanĩ 'cĩ ĩn nganĩt gōtōna cobbi irigi umwa 'cĩ hidici gěrrěēt 'lĩthaanĩtĩ noho. Hanneehi ělē irigi 'cĩ hidici noho inni? Anneeka 'laan mĩ cieeni 'cĩ hědēmakĩ eet biyyi. Kōr 'cĩ baa hadtuuhanĩ naa 'laan ngaatĩ ědēēmanĩ eeta biyyi ho niccia. Ma kōr umwa, iita tarĩ ĩdĩhĩt tĩna baa uruta gěrrěēt ũdūt. ĩn 'laanĩ lĩthaanĩt 'cĩg ědēēmanĩ eeta biyyi ōlō hĩ hōrga vėlěk.

'Thūwan hĩ 'Thukuul

Brunos Loki Philip

Baa aai bũhěēcĩ umwa 'cĩ haĩ 'thaar Natire 'cĩ ĩn tĩnaatĩ eet umwa 'cĩ haĩ Hũdaan. Baa ĩn Hũdaanĩ eet 'cĩ ěllēmĩth gěrrěēt hĩnĩngĩtĩ baa aa'nyĩk nēē bũhaanyĩnĩ 'cĩ haĩ Natire ho hũũk 'thukuula. Illimanōō 'thěk Natire ĩ'thōng hědēcaak halaath turkiyyio. Ma kōr umwa ikia 'goonnia 'cĩ haĩ thaar Ammĩnathĩa. Ma adtuuha Ammĩnathĩa Natire ngaatĩ ahimti ceremwa cĩg 'thukuulak ko, ijin gōōnĩ Hũdaan ĩnnĩk, “Gōōna, aa'nyihĩ occa gōōng loholec 'cĩ ngayyi hũũk 'thukuula nē hatĩ hummuiddia tĩn ĩna?” Baa ědēcĩ Hũdaanĩ annek, “Hĩdĩman iyyioko hutuno Ammĩnathĩa?” Ma cĩ nēēthěk hadtuuha eet ũgĩg aa'nyĩk lōhōlĩ 'cĩg ngayyik hōōt 'thukuula ĩnōō 'cĩ haĩnĩ ĩnya nuun haa'nyĩk Natire hũũk huttumanōōĩ 'thukuul ngaanĩngĩtĩ baa adaaknĩ ngaannia nĩnga.” ělē Hũdaan hadiim naag tĩn lōhōlēnĩ ĩcĩg ngayyik. Ne iyyioko, ma tarĩ ědēcaakeet nii Natire hũũk 'thukuula ho, nē nga thĩ hatĩ hammũda tĩn 'cĩg hadiim ko ngaana? A'nyeeek loholec hũ'thūwanĩ thōng hōbōddiaaĩ tĩn baag haruk 'gōllĩ aattĩnnĩ. Nĩngĩtĩ mĩ athĩknĩ Hũdaanĩ thōōth 'cĩ aduhaak ĩnōōnnō Ammĩnathĩa ho.

Ma baa urutaa cĩ nyĩlōk hōdēĩ, ingiddia eet umwaa 'cĩ aballi gěrrěēt 'cĩ haĩ Ayyioobok 'cĩ aku a'thūan Natire. Baa nēē tarĩ ěběk Natire Ayyioobok haaũ hĩcĩ acĩn ũthũrĩ baabbu haaga. Nēēthĩ hinnia hĩnĩngĩtĩ thōōth 'cĩ adiimi maajiha tĩna, iita ĩtĩngatteek nēēg Natire ĩttĩk lēēm Ayyioobok. Ma baa adtuuha Natire ngaatĩ anyamũūtanaanĩ maajiha ĩnōōnnō

hĩnĩngĩtĩ tĩn cĩg Ayyioobohĩ ho, ĩtĩnga itihim cērēmĩ haaũ hĩcĩ ōkō rŭgũũma. Ittiha hěēt 'cĩ tohomittio nē ũũk ĩ'thōng ōlō cĩ Ayyioobohĩ. Ma baa ma ōdōlan ōlō ho, ũmmũdoothĩk ōōt eeta cĩg olu vėlěk dtiicanēēnnĩ ĩcĩggĩng. Nĩngĩtĩ mĩ adukni Natire 'cieeth cĩ Ayyioobok nē itithingi hadaak nĩngaata.

Lotura hĩ Lohiirto

Brunos Loki Philip

Baa aai nyahaappanĩ umwa Hĩlaanyattĩ 'cĩ haĩ Lotura. Baa ĩn nēē tũhayyioohit cĩ tiinu. Ma kōr umwa, ĩtĩnga Lotura uulugi tĩn ōlō ũũhĩ hōrga. Ma baa ōdōlan nĩngĩtĩ 'cĩ adtuuha nēē abũnnaa ngaatĩ occa ĩnnĩ hōrōōg ko, ũlŭg araan nĩngaata. Au Lotura hōrgaa lōngōōc hithihi thōōth 'cĩ abathĩ. Kōr umwa, baa angĩdeek nēē tĩn geyyia 'rēēna. Ma baa ōbōdaanĩ tĩn ĩcĩ horgu baa 'jiaat ko, ammũdeek hinnia ucuda 'giimwa ira deera hĩ dťng. Ma ho, ĩlĩlĩ Lotura gěrrěēt nē ummuk ĩ, nganĩ occa 'thěk gōōng 'cĩ adĩman thōōth 'cĩ aai hoti ho?


Ma kōr umwa tarĩ, ĩngĩdeek nē tĩn geyyia tarĩ. Ma ōbōdaanĩ tĩn baa ĩ 'jiaatĩn lōōcĩ ho, ũmmũdeek ědēca 'giimwa ira hĩ baa 'rēēna tarĩ. Kōr nicciaa, ikia ōmmōthĩ Lotura gěrrěēt hatangu uraa. Ma ngerrenita, alahaneek aattĩ nēē tĩn hōōt geyyia ěmmēn nē atangu. Ma baa ma acĩnĩ ho, amudeek hinnia lohiirto ngaatĩ ōngōnyōōnĩ hĩ bolohoc cĩ deero. Nĩngĩtĩ mĩ anĩhōōthĩkĩ Lotura aracal hũvvũuca dĩla. Ma adtuuha lohiirto eet attĩlanniaak ĩnōōnnō dĩlaawa noho ho, ukul iitho mōrō. Ngaanĩngĩtĩ kōr tĩhō, ikia aga Lotura ngaatĩ ĩnnĩ lohiirto cĩ acũda ira deera cĩnnĩ ho.

Kōr niccia, ikia agaōōthĩ Lotura aĩ ĩkō abathĩ hatĩ hodoyyii. Abũnnaa hatĩ harabanni, aai ěētĩ 'cĩ ěběk hōrōōg, aĩ 'cĩ ũũha maalaa nē tarĩ aau 'cĩ ũũha tĩna hatĩ hiittiōō igorriaahiti hōllōngga aku ĩgōrthĩ.



Bũnnai hĩ Bathi cĩ Televvoono

Lomidiko Tĩmaan



'Gotoonooga hĩ ngonoooga, Morwak hĩ Nyakangaa'nya, Buheeci hĩ Nyahappanĩta, hĩthaayyuung ngagiit vėlėk gėrrėėt ũdūt. Őo'a 'cĩ nga hėtėhėtėdĩ thōōth umwa, haĩ hijinuung hĩnnĩhuung, ne 'cĩ haĩ Televvoon ko? Īn 'thėk Tėlėvvōōnĩ 'gii 'cĩ aaĩ

hutuno? Ne eet 'thėk 'cĩ aaĩ hutuno 'cĩ ēhėnyta Televvoon ko? Muhėtta caannĩ, ēhėnyta Televvoon eeta 'cĩg ōōrėėgĩ, ēggėėnyĩth eeta 'cĩg ōōrĩg hidiim hudukto hĩ Nyekuc thōng, ĩcĩnĩt thĩ dako ngaatĩ ēhėnytaanĩ 'gii 'cĩ agurra molook cĩ eet 'cĩ aayyiaa 'rėėna haau hĩcĩ obokii nĩnga noho. Ī'nya huduhaahuung dtėėllėn ũgĩ 'cĩg aĩ, baarkit, baa avvĩ Nyekuci eet 'ramma, eet 'cĩ ōōrĩ hĩ 'cĩ holli nē ũk ijin ĩnnĩk, Ne 'cĩ adiiimu niig? Ēdėcĩ ēėtĩ 'cĩ ōōrĩ Nyekuc aneek hadiimi 'gėėnyĩth, nē ēdėc 'cĩ holli ho Nyekuc ĩnnĩk, hadiimi naa baliinit. Ma 'thėk nĩngaata noho, aa'nyĩk Nyekuci eet 'cĩ ōōrĩ ho 'gėėnyĩth 'cĩ ajin nēē ho, nē tarĩ aa'nyĩk eet 'cĩ holli ho buúk baliinit hĩ aa ajin nēēnĩ, ĩnōō 'yioko 'cĩ ĩllōōanneet eeta 'cĩg ōōrĩg ngagĩt hėlėggėėnnĩ vėlėk ko. Ēhėnyta eeta 'cĩg ōōrĩg 'tiėera hililliaan hėtahujjėen hĩ 'thuuti nē 'thėk ētėhėnyta hėlėggĩ ũgĩ 'cĩg mēėlĩg 'rĩing 'cĩg 'yioko hacĩn naag ko. Nē thĩ ēėtĩ 'cĩ holliėėnĩ, ara hinnie jōrėėn 'cĩg aruhoonĩ hĩnĩngĩtĩ baliinit cĩ looc nicci.

Īn Tėlėvvōōnĩ 'gii 'cĩ aaddi gėrrėėt ũdūt, hĩnĩngĩtĩ aa'nyeet hothoo'thio hĩ eet lonyini vėlėk. Baa hũnũk baa nga aitiōō Tėlėvvōōnĩta tōō, baa gōōng nga ōkōmĩ gėrrėėt ngaatĩ athĩknōōnĩ eeta hĩ 'gōōnōgĩ 'cĩg aattiyiaa lonyinii 'cĩg 'rėėtĩg. Nē 'yioko, ũbũna gėrrėėt hĩnĩngĩtĩ, mǎ adiiimi nii eet umwa, tananga ayyiaa 'rėėna hode obokii, ũmmũj gėrrėėt ngaatĩ aruhėėkĩ nē othoo'thu thōōth tĩho edecciaak, hĩllōōan ngaatĩ occa adiiimo'thĩ eet tĩho thōng. Eelleet Tėlėvvōōnĩ buúk aa'nyeet hummuddia nyeemu'nya cĩg lonyinu hĩdĩkoothong. Nē tarĩ mǎ a'nyak ēėtĩ umwaa loholec hode lōhōlĩ 'cĩg aattiyiaa horong 'thukuulliohĩ 'rėėna, occa aga ngaatĩ athĩknōōnĩ hĩ ĩhōōggō hōdōōkōthĩ hĩllōōan ngaatĩ occa ēhėrōnōōthĩkĩ thong. Baa hũnũk buúk, baa gōōng ma aaĩ

thōōth 'cĩ abathĩ 'cĩ aaĩ hĩ luulu aa gōōng au akannĩ Lōgĩira hėlėggĩ, adtak eeta illieeret, nēēthĩ 'yioko, ũbũna gėrrėėt hĩnĩngĩtĩ etere'thiōō eeta Tėlėvvōōnĩtĩ.

Bathi cĩ Televvoono

Hōlō, thōōth umwa tarĩ cieeni, ĩn tėlėvvōōnĩ 'gii 'cĩ abũnaa gėrrėėt nē abathĩ 'pee. Hōdėĩ, abathĩ tėlėvvōōnĩ, hĩnĩngĩtĩ aduheeket 'rabbėeta. 'Ramma cĩnnĩ adiiim 'gwoo hiriiri. Attuman tarĩ tėlėvvōōnĩ lōhōlĩ cĩg 'thukuulak aa'nyĩk hittiōō hōllōngaa arrĩcana tigilėėnĩt, etebehini lōhōlĩ 'cĩg ngayyik, gōōng ma nga alimmani limmannioohiti, ĩthĩhu 'thėk uruhaak ēėtĩ umwaanĩ, ĩnōō cĩ acĩnnu niig 'thukuulliohĩ ũgėėgĩ, aggamaanĩ limmaniooha lōhōlĩ 'cĩg 'thukuulak tėlėvvōōnĩt hatĩ nga aattĩg 'thukuulatōō ĩ'thōng hũ'nyũgĩ 'thukuuli nē iita ēlėmtaahĩ eeta tėlėvvōōnĩt uruta ho. Adĩman limmaniooha hoti hĩnĩngĩtĩ ēmmėddaanĩ lohollia 'cĩg ngayyik ngaatĩ ēhėėdōnĩ hĩ buul 'cĩg ĩn nyahaappanĩt cĩggĩng tėlėvvōōnĩtĩ. Athingti loholec umwaa cĩ 'thukuulo baa nyĩlōk cĩ 'wecĩ irkit icci 'Juubatĩ hĩnĩngĩtĩ thōōth cĩ televvoono, aaĩ limmannioohiti umwaa noho nē aggama loholec cĩ 'thukuulo televvoon, ma abbuuk ko, amũda hinnie thōōth umwa 'cĩ baa ēhėėdak buuleniti umwaa loholec tĩho televvoonatōō. Ma nĩngaata, ikia ubbuuk televvoon nicci nē itigiil thōōth tĩho lohippitaacĩ 'gonoogiinni, ma thėk athĩhĩ loholec cieē thooth icci ho ikia aggam ngaani cobbi gėrrėėt ĩ'thōng hėtėėd looc 'gonoogiinitōō nĩngaata noho, ma ĩngaathĩ ho, irimi ũtũngeek thukuul. Ammuk hinnie 'goonoggia aĩ, horoong oho ōkō ĩcĩ oolu, ĩko nēē edeček ĩcĩ ōkō athingtėėnĩ thōng.

Anneek limmanniook ĩthĩhĩt thōōth icci jurrung nē ummuhit 'gōōl cĩ a'thũũnu lōhōlĩ 'thukuulliohĩ jurrung. Etertheeket thōōth cieē ngagĩt aĩ adiiim occa hadticaninini naag Tėlėvvōōnĩt 'gōōlaa 'cĩ abũnaa thōng. Gōōng hacĩn ngaatĩ ũgĩ cĩg obbitig buúk ōthōōnĩ televvoon hĩ eet tahatak. Thōōth tarĩ umwa cĩ irki'nyia iccig 'cĩ ma adiiim ēėtĩ umwaa a'thũanni, ittiōō hōllōngaa adiiim ēėtĩ jayyio 'thōng buúk, ēdėcaak 'thėk ēėtĩ hĩ loholec thōōth ēmmėn haga nĩngĩtĩ acĩnĩ loholec eggelleenyini haaga nē hōllōngaa agayyi ēėtĩ 'cĩ ēggėllėē'nyan ko bũtĩ. Mǎ a'nyahi nii televvoon, thōōthĩ

jurrung nē tarī ma hothoothonnu hī eet tahatak, ma hothoothi ukuma 'buth, ummuddia eeta 'cīg mēēlīg gērrēēt 'pīrnanīt hīnīngītī thōōth 'cī ō'ngōmtī ukuma.

Tithingēēnīt

Aurellio Lōhēccēēr Tadeeo



Ne 'cī haī tithingēēnīt ko?

Īn tithingēēnīt dīman 'cī aruhi ēētī ēlē hadaak. A'nyaha tithingēēnīt liili hēthēcanī eet oo. Athingti eet umwaa acud ēlē thōng, athingit gōōng umwaa ēlē mēerta; ahūd mērtī gērrēēt hīwaadī nyōō hēēngatōō hī dīng.

Athingit eet umwaa ēlē ahūd ēgērnēēn, athingti gōōng umwaa hatī īppīra iitiōō 'rabbēeta tōō.

Looccaa cīnaac, thoo'thiok 'cīg aduha terethiinit cī tithingēētō cieegi:

- Hatī aruk ēētī gōōnī
- Horoong hatī ōdōōm ēētī gōōnī, adīman 'buth, uumuneeek lōōcī, hatī abūrī loholec 'cī ngaayyi eet umwa, athingti eet umwaa hatī igori'thi ijjo, hode hatī adaahī ngaa hode maac.
- Gōōng athingti eet umwaa hīnīngītī athadeek thoo'thiok 'thīnītaa cīnī.
- Athingti eet umwaa hīnīngītī horoong ūmūda mōōrīth 'cī abathī gērrēēt 'cī aaī hī lōcūdī, nabbaacu hī 'reggeeli.

Thōōth cī occa hadīmanī:

Ēhēnytaaneeet ngagīt Nyekuci haauto hī thooura cīnēēnī nē akū rūgētī hī Nyekuc, nēēthī abūrī Nyekuci ngaaī occa aruhi eet umwaa ēlē tithingēētta. Baa nga hittirria naaga, baa hi'thihi 'gii 'cī haga nē hōllōngaa occa hanneek Nyekuc hadiimma harritiaanna hītta eet halangiōōhī tōō hode habīla

hode ngaa hode eet 'cī maacī 'cīg iyyioko aattīg looccaa cī Avvīrīka ho. Hēlēggī vēlēk 'cīg aluba cīg abathī, aluba tabiittaa cī Nyekuci nē aitioonneet ngagīt 'tirriani 'cī occa halaamī tōō. Nēēthī hoti ho, hōllōngaa occa hadiim haruk eeleeti hīnīngītī hōllōngaa ngagīt 'cīg hēhēnyta ho.

Tilooinit:

Ma odoommi eet umwaa aneeke aggiithi, duhaak anneek īlaallē ngaaī ammūdaanī 'giithenīt caannī. 'Gōōlaa īcī, anyamūutana nii liili 'cī eet 'cī odoommi aī aggiithi ho, hīnīngītī hīngīn naag vēlēk eeta, nē ha'nyak muhēēnīt 'cī aduhōō thōng. Nē dīdī, aitiōō ēētī 'cī aggiithi hīllōōan hode ēggēēnyīth hīllōōan loota nīnga tōō.

Má a'nyahi thōōth 'cī abathī 'cī occa etteeddi lokihoora, bīit hī 'gaadī hūūk hirrioon.

Má īn thōōth 'cī occa akūmaneeke hī 'goonoggu hatī hammanyani, diima 'goonu 'cī abūnnaa, hode eet umwa 'cī adtuuha nii ngaaī occa eelliina, duhaak īnōōnnō thōōth vēlēk 'cī aaī.

Má īn thōōth 'cī ngaaō hī maac, 'tīmman noo tilo īnōōnnō nē ma hōllōngaa athīknī, tūvva eet umwa, ma aalla nga abūrī noho, ī 'thī 'thēk 'gōōl 'cī gōōng aayyi nēē niccia.

Má aggami mōōrīthī, diimi ēlē ēggērnēēn hātī būna. Aitiōō mōōrīthī 'cī hi'thihi ēggērnaac tōō, tananga lōcūdī buúk, a'nyak ēggērnaac cīnī.

Thōōthaa 'cī adtuurna vēlēk, ma ūmūda bathī, diim eliinit nēēthī ma hammuhi hōdōōkōthī daahīth hīnīngītī īn niccia 'thēccan nē hōllōngaa hatī aduhuni habuccieet cī Nyekuci hēētahujjeen. Muhunooth ī aī 'Buuhi cī Nyekuci nēē, aaī hatī kōrra cī hēlēggī vēlēk. Aaī kōrra cī tirriaattō nē tarī aau cī daahīthōō. Nēēthī ma havviroothihi daahīth haaga noho nē īkō nēē hatī aaī kōrra 'cī hatī adaaknī niina.

Má anyahi nyeemuut 'cī iin ngeju ci adiiim aduhaahi Hibaall'ic 'cī Abbiiri Oo, tēhēēd nē īthōōwa didinga project@sil.org.

Má adiiim agiili 'buuhēt cīg dteellenu Dīdīngaayyi, mūda ngaati www.didinga.org